

BANTANG AWIG-AWIG LAN PARAREM DESA ADAT ABING

MURDHA CITTA	4
PRATHAMAS SARGAH ARAN LAN WIWIDANAN	5
DWITIYAS SARGAH PATITIS LAN PAMIKUKUH	5
TRTIYAS SARGAH SUKERTA TATA PAKRAMAN	6
Palet 1 Indik Krama	6
Palet 2 Indiik Prajuru Desa	9
Palet 3 Indik Kulkul	12
Palet 4 Induk Paruman	12
Palet 5 Indik Druwen Desa	14
Palet 6 Indik Penyanggra Banjar	14
CATURTHAS SARGAH SUKERTAN TATA AGAMA	15
Palet 1 Indik Dewa Yajnya	15
Palet 2 Indik Resi Yajnya	19
Palet 3 Indik Pitra Yajnya	20
Palet 4 Indik Manusa Yadnya	24
Palet 5 Indik Bhuta Yajnya	24

PANCAMAS SARGAH	SUKERTAN TATA PAWONGAN	25
	Palet 1 Indik Pawiwahan	25
	Palet 2 Indik Nyapihan	26
	Palet 3 Indik Sentana	26
	Palet 4 Indik Warisan	27
SASTHAS SARGAH	SUKERTAN TATA PALEMAHAN	27
	Palet 1 Karang, Tegal, lan Carik	27
	Palet 2 Pepayonan	27
	Palet 3 Wewangunan	28
	Palet 4 Wewalungan	29
	Palet 5 Bhaya	30
SAPTAMAS SARGAH	WICARA LAN PAMIDANDA	31
	Palet 1 Indik Wicara	31
	Palet 2 Indik Pamidanda	32
ASTAMAS SARGAH	NGUWAH – UWUHIN AWIG – AWIG	33
NAWAMAS SARGAH	SAMAPTA	34
LEPIHAN : I TETINASAN NYASA LAN SASANTI		37

MURDHA CITTA

OM AWIGENAM ASTU NAMO SIDDHAM

Sembah bakti miwah mangastawan titiang majeng ring paduka Bhatara – Bhatari sesuwunan titiang sami , riantukan wantah malarapan panghyangning kalih paswecan Ida Sang Hyang Widhi Wasa asung kretawaranugraha ngresti jagat jangkep rawuning sadagingnya sami , mawinan wenten kahuripan sekala niskala ring Bhuana Agung miwah ring Bhuana Alit. Manut dresta, Desane Kemanggehan sami dados pasayuban karma Desa rawuhin kulawarga pawongannya sami , mawastu raris Desane Kemanggehan pinaka pawakan Bhuana Agung, pawongannya Kameggahan pinaka pawakan Bhuana Alit.

Sotaning pawakan Bhuana Agung , Desane taler Kamenggahan pinaka pawakan Bhawa mamurit, sane kacirening antuk antuk wenten pakilit Tri Hita Karana sane tan Dados pasahan, luwire :

- Ha. Parhyangan, inggih punika :sahanan parhyangan panyiwian Desa,genah ngarcana Bhawan Ida Sana\g Hyang Parama wisesa, pinaka Jiwa pramana Desane;
- Na. Pawongan, inggih punika : gebogan krama rawuhing warga desa maka sami pawakan Tri Kaya pinaka bayu pramanan Desane mawinan Desane prasida molih prawretti;
- Ca. Palemahan, inggih punika : sahaning pakarangan, tegal, carik, miwah setra sakekuwuban Desa adat pinaka sthula sariran desane.

Adung patemoning Bhuwana Agung ring Bhuwana, maka larapan ngupadi santa jagaddhita , punika sinanggeh murddhaning prayojana pangriptaning awig-awig iki, rikala paseban mami krama desa Adat Abing pinaka sepat siku-siku pamatut miwah pamutus, wastu kasidan prayojanan mami kabeh, prasama angidep muwah amagehakena linggih, awig-awig kadi ring sor iki.

PRATHAMAS SARGAH
ARAN LAN WEWIDANGAN DESA

Pawos 1

1. Desa adat puniki mawasta desa adat abing .
2. Jebar kekuwub wewidangannye mawaates nyatur desa;
Ha . sisi wetan tukad yeh sumi.
Na. sisi kidul tukad yeh sumi.
Ca. sisi kidul tukad yeh sumi lan tukad penet.
Ra . sisi lor desa adat juwuk legi.
3. Jebar kekuwub wewidangan sane, mawangku antuk wates – wates inucap ring ajeng , wenten 25 ha.
4. Sane kamanggehang ngranjing dados kekuwub wewidangan desa pakraman punika , manut dresta, luwire:
Ha. Pupulan karang paumahan sane sinenggeh palemahan desa adat abing;
Na. setra, carik miwah tegal sane wenten ring kekuwub wewidangan desa adat, manggeh
Ngranjing dados telajakan desa adat abing
5. Awig-awig, pararem miwah sahanan pasuaran desa, manggeh kajejerang ring jabar kekuwub wewidangan desa adat puniki sami.

DWITIYAS SARGAH
PATITIS LAN PAMIKUKUH

Pawos 2

Desa adat abing ngemanggenah pamikukuh, minakadi :

1. Pancasila.
2. Undang – undang dasar 1945.
3. Tri hita karana, manut sadacara agama hindu
4. Hak azasi manusia utawi ham.

Pawos 3

Luwir patitis desa adat abing:

1. Mikukuhin miwah ngrajegan sang hyang widhi agama.
2. Nginggilan tata prawrettne maagama.
3. Ngrajegan kasukertan desa saha pawongannya sekala lan niskala.

TRTIYASA SARGAH

SUKERTAN TATA PAKRAMAN

Palet 1

Indik krama.

Pawos 4

1. Sahaning sang jenek mapaumahan ring wewengkon wewidangan desa adat abing linggih warga desa.
2. Warga desa inucap ring ajeng, linggihnyane wenten 3 (tigang) soroh:
 - Ha. Warga desa sane maagama hindu tur sareng nyungkemin kahyangan desa adat Abing, sinanggeh krama desa adat abing.
 - Na. warga desa sane maagama hindu sane wantah nyarengin ring pawongan miwah Palemahan kawentenan, sinanggeh krama tamiu, sane kasulurang manut pararem.
 1. sane madrue tanah 1 hektar = Rp. 1.000.000/ satu tahun.
 2. Sane madrue tanah 50 are = Rp. 500.000.00/ satutahun.
 3. Yening tanah Negara sakeng desa adat abing keni perarem perare keni Rp.2500
 4. Yening kegarap saking dura desa patut keni sekadi pararem ring unkur. Patut keni penanjung batu perare Rp.10.000.
 5. Yening krama tamiu sane madrue tanan di wewidangan desa adat abing, makarye usaha, sane utsahannyane menengah kebawah patut kenin dudukan akeh nyane Rp 1.000.000.
 6. Yening krama tamiu sane madue tanah di wewidangan desa adat abing makarya usaha sane utsahan nyane, manengah ke atas patut keni dudukan akeh nyane Rp.2000.000
 - Ca. warga desa boya maagama hindu sane wantah nyarengin ring pawongan miwah Palemahan kawenten,sinanggeh tamiu sane kasulurang manut pararem.
 1. Keni dudukan 1 tahun akehnyan Rp.1000.000. asiki kk.

Pawos 5

Dasar pakraman:

1. Sahanan warga desa sane sampun marabian, patut ngawit dados krama desa.
2. Satunggil krama manut karendahan kulawarganya,patut keni sinalih tunggil ayah-ayah:
 - Ha. Ayahan ngarep;
 - Na. ayahan balu;
3. Sesengker ngawit tedun ngayah:
 - Ha. Marep ring krama desa sane mawit saking pawiwahan tigang sasih saking puput Makala-kalaan;
 - ha. Marep ring krama desa sane mawit saking ngarangin sane sarng makrama desa, kasulurang manut pararem.
 1. Patut ngalengkapin nyangkepin surat pindah KTP, KK.
 2. Sesampun jangkep surat – surat KTP utawi KK sah dados krama adat abing
 3. Polih puputan ayah tigang sasih sakeng sah pecatet ring kepala wilayah muang desa adat abing.
 4. Keni penanjung batu akehnyane kemanutan kas desa adat abing.
4. Krama desa sane wenang nyada yan sampun kapastika,luwire:
 - Ha. Sungkan tahunan;
 - Na. yen sampun maderbe pangantos utawi panyeledi ;
 - Ca. risampun mayusa 65 warsa yan tan maderbe panyeledi.
5. Sang saking sewosan desa yan sareng tedun makrama desa ring desa adat abing, patut keni batu-batu utawi pamogpog,sane agengnyane kasulurang manut pararem.
 1. Indik toyo minum patut kenin penanjung batu akehnyane Rp1.000.000.
 2. Polih pipa 1/2dim 1 batang sakeng pipa induk, asiki pemesuan
 3. Yen wenten sinalih tunggil krama sane nganggen usaha toyo duen dese adat patut keni Rp.100.000/bulan, sedurung presida desa adat numasan kelo meter.
6. Yen wenten krama saking sewosan desa sareng ngranjing makrama desa ring desa adat abing, patut kaduluring antuk surat keterangan sane jangkep.

Pawos 6

Wusan dados krama desa, luwir :

1. Sangkaning :
 - Ha. Seda;
 - Na. piunas ngrage,menawi magingsir lingsir saking wewengkon desa adat Abing;
 - Ca. kanorayang malantaran piwal ring awig-awig miwah pararem krama desa, utawi tan satinut ring pidutuh prajuru sejeroning indik nyupat sikian, minakadi nenten prasida ngesenin prawretti;

2. Sang wusan dados krama desa tan polih pahpahan druwen desa, sajawaning pahpahan sane mawit saking usaha banjar, miwah tan polih pasayuban malih sejeroning ala ayu.
3. Tata titine nitenin wusan dados krama desa inucap ring ajeng, kasulurang manut pararem.

Pawos 7

Sahanan krama desa,patut keni tetegenan utawi ayah-ayah,luwire:

1. Ayahan ngarep, mapiteges paturunan, peson-peson miwah ayahan mamungkul saking krama ngarep.
2. Ayahan bulu, luwire :
 - Ha. Balu remban, sane pianaknyane kantung alit-alit, punika keni ayahan balu remban, sane kasulurang manut pararem;
 1. Yen sampun pianaknyane sane lanang utawi istri maayah,18 tahun wenang tedun maayah ayah ke sulurang,oleh pejuru.
 - 3. Ritatkala ngardi wewangunan marep kabuatan desa adat,kramane sajaba keni ayahan manut kecape ring ajeng,taler keni paturunan sakadi ring sor :
 - Ha. Paturunan sama wibhaga manut pararem ;
 - Na. Dana punia,manut kalascaryang sang madana punia.
4. Krama desa, kadadosang :
 - Ha. Mapuankid utawi tedun ngayah / parum :
 1. Rikala mapawangunan,ngaraabin,nangun yajnya,nandur,kaluawasan masengker dewasa;
 2. Keni dedawuan saking guru wisesa;
 3. Kapialang, luwire : sungkan, matepetin, kalayusekaran,lan sakancan punika.
 - Na. dados ngwakilan ring jatma tiosan,sane sampun menek daa/truna.
 - Ca. dados ngampel utawi numbas ayahan, prade :
 1. Dados pegawai negeri utawi pegawai parusahaan swasta;
 2. Magenah ring desa sawosan malantaran ngrereh pakaryan.
 - Ra. Dados nyeledi utawi nyuksukin krama ngarep yan sampun mayusa 17 th

Pawos 8

Kapatutan krama tamiu lan tamiu :

1. Krama tamiu lan tamiu, patut madana punia ring desa/banjar adat, manut pararem
 - Ha. Keluarga patut keni Rp25.000 ngesasih
 - Na. Tamiu patut keni Rp 50.000 adin ngesasih
2. Krama tamiu lan tamiu, patut polih pasayuban marupa pamitulung rikenjakan katiben panca baya.

Pawos 9

Paturunan miwah leluputan :

1. Paturuana miwah peson-peson sejeroning ngulati kasukertan desa adat, kapitegenang ring krama desa adat.
2. Desa adat, wenang maneh leluputan ayahan miwah peson-peson ring sang inggilang linggih miwah sang kawelasan.
3. Sor singgih leluputan miwah bacakan sang polih leluputan, kaunggahan jeroning pararem.
4. Sajawaning prajuru desa adat, sane taler pastika polih leluputan, luwire :
Ha. Para sadhaka minakadi pamangku kayangan/panyiwian desa, lan Panyada;
Na. para serati lan surati;
Ca. sang sungkan tahunan;
Ra. Wong cedangga banget;
Ka. Wong ubuh meme bapa, jantos mayusa 21 warsa sampun mawiwahan

Palet 2

Indik prajuru desa

Pawos 10

1. Desa adat abing keanter antuk prajuru desa adat kamanggakala antuk bendesa adat
2. Prajuru desa adat patut:
Ha. Mawit saking krama ngarep ;
Na. kaadegan prajuru malantaran antuk pamilihan jeroning paruman Krama desa adat, nyabran 5(limang) warsa, sajawaning wenten pariindikan tios, tur sang sampun puputing panumayan kengin kapilih malih;
ca. maduluran atur piuning ring pura desa.

Pawos 11

1. Bendesa adat, karombo antuk :
Ha. Petajuh, pinaka wakil bedesa adat;
Na. panyarikan, pinaka juru surat;
Ca. pategen, pinaka pengmong druwen desa;
Ra. Kasinoman, pinaka juru gumencang;
2. Sejeroning ngenterang kasukertan ka niskala, bendesa adat, patut misinggihan pamangku kahyangan desa.

Pawos 12

1. Swardharmaning bendesa adat luwire ;
 - Ha. Ngenterang paruman-paruman desa adat;
 - Na. ngenterang pelaksanaan sadaging awig-awig miwah pamutus – pamutus krama desa,sane Sinanggeh pararem;
 - Ca. ngraksa miwah nudonang tata titine migunayang sarajabrana druwen desa ;
 - Ra. Nuntun saha ngenteran krama desa rawuhing warga desa sami, ngupadi kasukertan Sekala lan niskala;
 - Ka. Nuntun sah saksi upacara sangaskaraning kahuripan sane mabuat, minakadi sane ngilitang sulur pakulawargan;
 - Da. Nuntun saha ngenterang warga desa, nginggilan sang hyang agama, kasucian palmahan, kasucian pawongan, miwah tat titine mingunayang setra;
 - Ta. Mawosin miwah niwakang pamutus marep ring wicaran warga desa;
 - Sa. Ngwakilin desa adat, matemuang bebawos ring saparita ugi;
 - Wa. Lan sane sawosan sane wenten pakilitnya ring desa adat.
2. Tata titine nglaksananya yang swadharma inucap ring ajeng , tan maren patut satinut ring daging awig-awig, pararem, dresta miwah pamutus paruman krama desa adat.
3. Panglaksanane ring ajeng patut kasiarang ring desa adat,kapungkuripun.
4. Sumakutan utawi sumanggup natak pamutus maruman krama desa adat, ngeninin swadharman sowing-sowang

Pawos 13

Patias utawi olih-olihan prajuru desa adat , liwire :

- Ha. Luput reramon utawi peson-peson;
- Na. luput patutiran marp ring kabuatan desa adat;
- Ca. polih tanding tengah;
- Ra. Patias sewosan manut pararem.

Pawos14

1. Prajuru desa adat, kapilih nyabran 5 warsa, ngawit saking padewasane kaadegan prajuru desa adat;
2. Prajuru desa adat sane swadharman sampun puputing sengker, kengin kapilih malih ;
3. Pariindikane ngadegang prajuru desa adat sakaluwire, kapastikayang malarapan paruman krama desa adatur kaingkupin antuk krama;
4. Wusan dados prajuru desa adat sangkaning :
 - Ha. Lina;
 - Na. Pinunas ngraga malantaran jalaran san pastika;
 - Ca. Swadharman sampun puputing sangker ;
 - Ra. Kawusanang/kanorayang olih krama desa duaning iwang pamargi, menawi nilar sesana.
5. Ngentosin, ngwusanang utawi nganorayang prajuru desa adat, patut kamargiang sejeroning paruman krama desa adat tur kaingkupin antuk pinih kedik kalih pah tiga gebogan krama desa sane rawuh.

Palet 3
Indik kulkul
Pawos 15

1. Dudonan kulkul ring desa adat abing, luwire :
Ha. Kulkul desa;
Na. kulkul banjar;
Ca. kulkul sekaa-seka;
2. Kulkul desa / banjar adat, kamanggehan pinaka piranti utawi sarana tengeran maka wangsit, ring wewekon wewidangan desa/banjar adat
3. Tetepakan suara kulkul manut dresta, tur anggah-anggah tetepakanipun kaungahanjeroning pararem.

Pawos 16

1. Kulkul desa / banjar adat ten wenten katepak yen tan sangkaning pituduh prajuru,sajawaning tengrankapancabhaya.
2. Sang nepak kulkul desa / banjar adat, tan sangkaning pituduh prajuru,patut digelis atursupakse maka buatan panepekan; yen piwah,sang manurug wenang katibakin danda,manut pararem.
3. Kulkul seka-seka miwah kulkul pondokan – pondokan,tan kalugra nyawerin utawi matehin sukat miwah tetepakan kulkul desa/banjar adat; prade mamurug,sang mamurug taler wenang katibakin denda,manut pararem.

Palet 4
Indik paruman
Pawos 17

1. Dudonan paruman ring desa adat abing, luwire ;
Ha. Paruman krama desa, kawntenang sanistannya apisan jeroning awarsautawi amanut kabuatan,sane karihinin antuk tetiban arah-arah.
Na. paruman padgatakala,rehning wenten indik sane dahat mabuat sane pacang kabawosang, sane karihinin antuk tetiban arah-arah;
Ca. paruman krama banjar kewntenan nyabran sasih madarbe tegak sangkepan sane pastika manut pararem ring banjar;
Ra. Paruman prajuru,kawntenan manut kabuatan;
Ka. Paruman sekaa-seka, kawntenang maut kabuatan.
2. Pemargin parum desa/banjar adat,patut nganumin dudonan:
Ha. Paruman wahu kengin kakawitin sasampun ketedunin antuk pinih kedikkalih peh tiga lintang saking sang patut ngamiletin paruman,kamangkale antuk tengeran suaran kulkul mabusana adat bali, tan kalugra makta gegawan sakaluwire, kariyinin antuk ngarcana bhagawan panyarikan, majalaran widdhi widhana lan cane;
Na. maka ngawit kalaksanayang panyacak pangasep, karuntutin antuk nyakcak dedosan, wahu kalanturan antuk parum;sasampun parumane patut, patut kacacak malih, tur sane kasep, sang ninggal paruman miwah san nosa,wenang ketiban denda, sane ageng alipun kasulurang manut pararem.
 1. Parum ring balei banjar Rp 5000.

Ca. maka pamastika wahu kengin nyacak pangasep, kasulurang manut pararem.

Ra. Sejeroning paruman tan kalugra ngwetuang wak ghora minakadi ngardi biota; sang mamurug wenang keni pemedanda bea pacamil, sakadi dandaning anguman-uman ring paseban, sane kasulurang manut pararem;

1. Patut keni pamidanda akehnyane Rp 100.000.
2. Keni prali / ta biokaonan ring pure melanting.

Ka. Pamutus bebawos sane briuk sapanggul utawi ingkup, punika sane keaptiang tur kamanggehang; prada nenten prasida, pamutus bebawosan mangda kancumponing antuk pinih kedik kalih pah tiga lintang saking sang ngamiletin peparuman.

3. Prada daging peparuman nenten kaingkupin, prajuru desa / banjar adat mangda ngilikang bebaos, saha pamutusnya mangda kararemin antuk krama desa/bajar adat, bilih jantos ping tiga tan nenten prasida kaingkupin, prajuru desa/banjar adat kengin nunasang indike punika ring sang maraga guru wisesa.

Pawos 18

1. Sejeroning paruman krama desa, bendesa adat patut nyiarang pemargine ngenterang desa, pemekas ngenenin indik :
Ha. Munjuk lungsuring gebugan pakraman saha ayah-ayahan nyane, minakadi sulur arthabrana druwen desa adat.
Na. pengrencanang prajuru, ngenenin usaha desane kapungkur.
2. Pamutus paruman krama desa sane singgeh pararem, kamenggehan maka pamitegep panglaksanang awig-awig.

Pawos 19

1. Paruman prejuru desa adat kawenangang wantah ngericikang pangrencanang marep ring usaha desane kapungkur.
2. Paruman prajuru desa adat tan kawenangang ngamedalang teteganan ring krama desa, saderenge kaingkupin antuk krama desa.
3. Pamutus paruman prajuru, kenging ngwatuang pasuara manut daging pituduh sang ngawarat, utawi ngonekang pamutus sane pecak sampun dados pararem krama desa.

Palet 5

Indik druwen desa

Pawos 20

1. Sane kamanggehang dados druwen desa adat abing luwire:
Ha. Kahyangan desa luwire :
 1. Kahyangan tiga : pura desa, pura puseh, pura dalem;
 2. Kahyangan druwen seda sewosan ring kahyangan tiga minakadi : prajapati, palinggih bhagawan panyarikan.

Na. setra 5 are.

Ca. Nyasa lan sasanti.

Ra. Lekita-lekita : pipil utawi sertifikat, awig-awig, pasuara, kalih sepeda motor;

Ka. Lelangwan, minakadi tetabuhan lan ilen-ilen druwen desa luwire:

1. Angklung abarung
2. Ilen-ilen wali ring pura; rejang pendet.

2. olih-olihan desa adat abing mawit saking :

Ha. Paturunan saking krama desa;

Na. paica saking guru wisesa ;

Ca. dana punia tiyosan sane patut;

3. sanangken paruman krama desa, bendesa adat patut nyiarang munjuk lungsor olih-olihan sane sinanggeh druwen desa.

4. olih-olihan desa adat druwen desa kaanggen prabea piodalan miwah wewangunan ring pura, taler

prabea tiosan marep ring kabuatan desa adat.

5. sakaluwiring druwen desa patut wenten ilakitannya sane pastika.

6. tan kalugra ngadol utawi ngasahang druwn desa yan tan kacumponin antuk krama desa sami.

Palet 6

Indik panyanggran banjar

Pawos 21

1. Krama banjar ring wwengkon desa adat abing patut sareng nyanggra karya suka dukan sowing-sowang krama banjar.
2. Tetiban penyanggrane inucap ring ajeng, kasulurang manut pararem.
3. Sowing-sowang krama banjar sane pacang nangun karya suka duka sane mabuat, mangda masadok ring prajuru.

CATURTHAS SARGA
SUKERTAN TATA AGAMA

Palet 1

Indik dewa yadnya .

Pawos 22

1. Kahyangan-kahyangan panyiwian krama desa adat abing,luwire :
Ha. Kahyangan tiga : pura desa/baleagug,pura puseh, pura dalem;
Na. Kahyangan-kahyangan panyiwian krama desa tiosan ring kahyangan tiga : prajapati miwah palinggih bhagawan panyarikan.
2. Tegak piodalan ring sowang-sowang kahyangan inucap ring ajeng,kamanggehan sakadi ring sor puniki:
Ha. Pura desa/bale agung, ring rahina buda,klowon,wuku ugu;
Na. pura puseh, ring rahina buda, kliwon, wuku ugu;
Ca. pura dalem lan prajapati , ring rahina buda, wage,wuku warigadean;
Ra. Palinggih bhagawan panyarikan, ring rahina saniscara, kliwon, wuku wariga.
3. Pamargi pangacine ring sowang-sowang kahyangan ring ajeng,manut kecap sastra agama,saha kalaksanayang kanistan, madhya, utama,manut kawentenan krama sane kaingkupin jeroning pararem.

Pawos 23

1. Ring sowang-sowang pura inucap ring ajeng, patut kaadegang pamangku.
2. Pidabdabe ngadegang pemangku,nganutin dudonan:
Ha. Ngwilang saking turunan utawi ngwaris;
Na. malanratan nyanjan utawi nuhur ring pura sane karerehang pamangku;
Ca. malantaran kapilih antuk krama desa.
3. Sang tan wenang kaadegang dados pamangku , luwire :
Ha. Cedangga, luwire : peceng,perot,cungih lan spanunggalannya;
Na. sapa ring ugi sane nenten kapatutang manut pararem;
Ca. nandang sakit ila ,ayan, buduh miwah pinungkan sane tam keneng tinamban;
Ra. Sang madarbe parilaksana nenten becik.
4. Prabea kapamangkuan :
Ha. Prabea adiksa widhi utawi ngewintenan pamangku, kemendalin miwah kalaksanayang antuk krama desa
Na. marep ring prabea pitra yajnya ring pemangku kahyangan druwen desa desa yan seda ri wekas, krama desane patut maweh dana punia atiwa-tiwa, manut pararem.
5. Pamangku, patut ngamanggehang sesana miwahagem-ageman pamangku.

Pawos 24

Swadharmaning pamangku:

- Ha. Ngenterang upacara piodalan ring kahyangan sane kaempon utawi ring pakubon sowang-sowang krama;
- Na. prada sinalih tunggil pamagku kahyangan desa kapialang utawi cuntaka, rikala piodalan ring pura sane kaempon, kengin nyeleng pemangku kahyangan desa tiosan, utawi nuhur sang sulinggih, katitening antuk prajuru;
- Ca. yen pangku kalayusekara, wenang anglepas swadharman, kasulurang kasuluran antuk pararem.
 - 1. Kapamitang oleh kaluarganyane kasaksian prajuru desa adat abing
 - 2. Yening jro mangku lanang sane kalayusekaran kepatutan ayah-ayahane kepemangkuan nyane ke kelanturan olih mangku istri.
 - 3. Krama desa adat ngmanggehan I Made Winia pinaka pemangku pura dalem lan meraja pati, I Nyoman Mertha pinaka pemangku pura puseh lan desa sangkaning kacatri turmaning kacumponin oleh warga desa krama desa adat abing
 - 4. Indik olih-olihan pemangku pemekas ritat kala kalayusekaran pemangku inucap wenang keabenan jantos puput melinggih ring ibu kemulan, prebea pengabenan inucap seprapatnyane kemedalan saking keluarganyane dane jro mangku selanturnyane dados swadharmaning krama desa satmaka rsi yadnya
 - 5. Sepolah palih pemargin yadnya inucap kepuputan oleh krama desa, kaenter antuk dulun desa minakadi Jro Bendesa Adat.
- Ra. Yen pamangku sampun tigang rahina ngayah ring pura sane kaempon, kancit wenten kaluarganyane kaluyusekaran, pamangku inucap tan keneng cuntaka, sakawenten nenten kengin budal salamin piodalan;
- Ka. Mungguh tedun ring palinggih-palingih kahyangan desa miwah ngiyasin pralingga-pralingga;
- Da. Ngrajegang sesana pamangku.

Pawos 25

Patias utawi olih-olihan pamangku, luwire :

- Ha. Payosalan miwah sarin canang rikala muput yajnya ring sowang-sowang pakubon krama;
- Na. luput pakaryan miwah reramon;
- Ca. polih apahtiga sarin canang rikala wenten aci ring kahyangan sane kaemponin;
- Ra. Luput saluwiring pradean wewangunan ring kahyangan sane kaemponin.

Pawos 26

- 1. Pamangku kagentosin, riantukan:
 - Ha. Seda;
 - Na. pinunas ngrage, manawi kageringan lan sapaunggilannya;
 - Ca. kawusanang antuk krama, riantukan nilar sesanan pamangku.

2. Tatacarane ngadegang miwah ngentosin pamangku, kasulurang manut pararem.

Pawos 27

1. Indik kasukertan kahyangan, kadudonan sakadi ring sor puniki :
 - Ha. Sang katiban cuntaka, minakadi sebel ngraga :
 1. Sebel kendel ngrajaswala, salami dereng mabersih;
 2. Sebet antuk ngembasang putra, salami 42 rahina, pateh ring sang karuron;
 3. Sebet pangantenan, sadereng mabiakala utawimakala-kalaan;
 4. Sebet riantukan kalayuskaran, jantos puputing senger sane kaingkupin jeroning pararem.
 - Na. makta sahananning bebaktan sane sinanggeh ngletehin, manut kecap sastra agama;
 - Ca. sato agung minakadi wewalungan suku pat, sajawaning rikala mapepada;
 - Ra. Anak alit sedereng mayusa tigang sasih;
 - Ka. Mabusana sane tanmanut kadi tatacaraning ngrajing ka pura,sadereng polih wak-wakan utawi pituduh saking prajuru desa adat
2. Tata busanane ngranjing ke pura, kasulurang manut pararem
 - Ha. Mabusana adat agama hindu.
3. Pratingkahe tan wenang ring pura luwire ;
 - Ha. Masumpah utawi macoran, sajawaning wit saking pituduh prajuru desa adat;
 - Na. ngamedalang wak parusya utawi wak capala;
 - Ca. mabanyu,makoratan, masesenengan, makolem dados asiki lanang wadon nyangsang busana;
 - Ra. Ngias raga minakadi menahang wastra, menahang pusungan lan sakancan punika. Sajawaning sang sulinggih miwah pinandita;
 - Ka. Masusuin anak alit.
4. Sewosanring pemangku tan kalugra munggah tedun ring palinggih-palinggih, sajawaning wit saking pituduh prajuru desa adat.
5. Sang mamurug kecape ring ajeng, wenang keni dewa danda, manut pamutus pararem.

Pawos 28

1. Yen wenten jatma karawuhan ring pura boya sangkaning nyanjan tur ngawinan kramane biapara, wenang keni dewa danda lan artha danda, sane kasuluran manut pararem.
 - Ha. Keni arta dande Rp 1.000.000.
 - Na. keni upacara pecaruan prascita biukaonan
2. Prada kahyangan desane kahanan durmanggala minakadi kapancabhaya, pamangku patut digelis masadok ring prajuru desa adat
3. Indik upakara/upacara pamahayun kadurmanggala kahyangan desa, mapagamel kecap sastra agama, sane kasungkemin olih krama desa.

Palet 2

Indik rsi yadnya.

Pawos 29

1. Sang pacang madeg sulinggih utawi madwijati patut masadok ring prajuru desa adat miwah parisada hindu dharma Indonesia.

2. Prajuru desa adat patut ngawas lan nitenintur wenang mialangin , prada kacihnan wentenindik sane tan manut kecap sastra agama, tur sareng nyaksi upakara/upacara padwijatinnyana, saha ngatur nyiarang sejeroning paruman krama desa tegep rauhing wetes kawenangannya muput yajnya.
3. Krama desa patut madana punia sapamadeg miwah ring panglepas sang sulinggih riwekas, katuntun antuk prajuru desa.
4. Sang sulinggih wenang polih leluputan ayahan miwah peson-peson.

Pawos 30

1. Sejeroning muput yadnya, sang sulinggih patut ngutamayang muput yajnya ring wewengkon desa adat abing, sasampun patut, wahu muput yajnya ring wewengkon desa tiosan utawi ka duru desa.
2. Krama desane sami, patut sareng ngawas lan nitenin katuntun antuk prajuru, mangda sahanan yadnya sane kalaksanayang olih sowang-sowang krama desa, kapuput olih sulinggih utawi pinandita, manut kawenangannya sowang-sowang.

Palet 3 Indik pitra yadnya Pawos 31

1. Desa adat abing patut sareng nyanggra yen wenten sinalih tunggil krama sane ngelaksanayang upacara pitra yajnya
2. Tatacara penyanggrane inucap ring ajeng kasuluran manut pararem.
 - Ha. Sang kalayu skaran jagi makingsan/ring pratiwi
 1. Krama desa adat patut keni patus Rp. 20.000;
 2. Krama desa adat istri keni patus bras 1 kg jinah Rp 5000;
 3. Krama desa adat keni kasebelan sesampone ngurugin ring setra tigang rahina;
 4. Polih pagebagang apisan wusan mendem sang kalayusekaran;
 - Na. sang kelayu skaran sane wenten dewasa mendem
 1. Krama desa adat patut keni patus Rp 20.000;
 2. Krama desa adat istri keni patus bras 1 kg jinah Rp 5000;
 3. Krama desa patut makarya upadana mapendem;
 - Ca. sang kalayu skaran jagi makingsan ring geni
 1. Krama desa lanang keni patus Rp 20.000;
 2. Krama desa istri keni patus 1 kg jinah Rp 5000;
 3. Krama desa peson –peson manut pinunas sang maduwe kelayu sekaran;
 4. Krama desa adat patut nitenin upakara kelayu sekaran lan uparngga sang kelayu sekaran, ayahan tur puput ring setra;

Ra. Sang meduwe kelayu sekaran jagi ngaben utawi palebon

1. Krama desa adat lanang keni patus Rp 100.000;
 2. Krama desa istri keni patus bras 3 kg jinah sekadi patut;
 3. Krama desa adat lanang / istri keni peson-peson manut pinunas sang maduwe kelayu sekaran;
 4. Krama desa adat lanang istri patut nitenin upakara uparengga sang meduwe kelayu sekaran ayahan tur puput
3. dudonan pemargi pitra yajnya;

Ha. Majalaran mendem utawi ngeseng, maka china makingsan ring pratiwi utawi makingsan ring geni, pinaka dharana antos nuptupang prabea;

Na. majalaran upacara pangabenan utawi palebon;

Ca. riwusan ngaben, patut kelanturan malih antuk upacara ngrorasin(mamukur) tur karuntutin malih antuk nglinggihang dewa pitara.

Pawos 32

1. Sinalih tunggil krama sane kalayusekaran/ atiwa-tiwa, mangda mesadok ring prajuru.
2. Swadharmaning desa/banjar;
Ha. Keliyan banjar/kelihan adat, patut maritatas sang kaduhkitan,napike sawane pacang kapendem,
makingsan ring geni utawi lantur keabenang;
Na. yen sampun pastika, kelihan adat raris nepak kulkul tengeran kalayusekaran;
Ca. prabea kapendem, panyanggran krama banjar selanturanya manut sekadi sane sampun kaunggulan jroning pararem, jantos pependeman puput;
Ra. Prada makingsan ring geni, panyanggran krama banjar selanturan, manut kadi daging pararem,
jantos pemargi upararene puput;
Ka. Prada kaabenang, panyanggran krama banjar salanturnya, manut kadi daging pararm,
jantos
pamargin upacarane puput.
3. Tan kalugran nginepan bangbang.
4. Desane maweh galah ring sang kalayuskaran sejeroning pitung rahina kengin atiwa-tiwa, sajawaning wenten kabuatan tios saking sang yajamana.
5. Larangan pependeman miwah palebon ring wewengkon desa adat abing kaunggulan ring sejeroning pararem .
Ha. Tan kedadosan mendem sawa ritatkala tegak rahina ring pure kahyangan ring wewidangan desa adat abing
Na. tan kedadosan mendem ritatkala rahinan jagat umpami purnama,tilem,wewidangan sane
Tiosan

Pawos 33

1. desa adat abing ngamanggna indik cutaka, mapagambel ring pamutus masahabha parisadha hindu dharma Indonesia.
2. Tatacar nyulurang kacuntakan, mapagambel kecap sastra agama, kaanutang ring dresta desa, sane kaingkupin ring seroning pararem.
3. Sinalih tunggil krama sane kahanan cuntaka, yan durung utas, tan kalugran nyarubin genah suci druwen desa miwah druwen sowing-sowang krama.
4. Sang mamurug, patut keni dewa denda, manut pararem.
5. Sangker utas cuntaka manut kawentenannya, kasuluran sakadi ring sor puniki :
 - Ha. Kalayusekaran cuntakanya kaanutang ring drestan desa miwah setra dresta, kasulurang manut pararem;
 - Na. ngrajaswala, cuntakannya tigang rahina ngawit saking ngrajaswala , utawi salamin ngrajaswala;
 - Ca. ngembasang putra, abulan putung rahina ngawit saking putrane embas, ngantos katiwakin upakara/upacara tutug kambuhan;
 - Ra. Karuron, cuntakannya abulan pitung rahina ngawit saking karuron, ngantos katiwakin tirtha Pemrayascitta;
 - Ka. Pawiwahan, cuntakannya ngantos sampun makal-kalaan;
 - Da. Gamia gamana, cuntakannya sikian desa adat miwah kahyangan desa;
 - Ta. Salah timpal, cuntakannya kapuputang manut kecap sastra agama miwah drestan desa;
 - Sa. Anak istri mobot malantaran lokika sanggraha kandugi nenten katiwakin upakara/upacara Pabiukawonan, cuntakannya ngantos katiwakin upakara/upacara pabiukawonan
 - wa. Anak istri ngembasang putra malantaran lokika sanggraha kandugi pecak nenten katiwakin upakara/upacara pabiukawonan miwah widhi widhana, cuntakannya ngantos wenten merasa anake alit karuntutin antuk upakara/upacara manut kecap sastra agama;
 - la. Mamitra ngalang, cuntakannya ngantos katiwakin upakara/upacara pabiukawonan;
 - ma. Sad atayai, cuntakannya ngantos sampun mrayascitta sikian miwah ngeshin prawreti.
6. Cuntaka kalayusekaran/ kapademan;
 - Ha. Kapendem, cuntakannya:
 1. Cuntak ka banjar, laminipun tigang rahina ngawit saking wusan mendem, ngantos sampun maprayascitta(masepuh)
 2. Kaluwarganya sejeroning pakarang abulan pitung rahina.
 - Na. kaabenang, cuntakannya:
 1. Cuntaka ka banjar, manut dresta sane kapikukuh antuk pararem;
 2. Cuntaka sang nyambut karya pitra yajnya, manut dresta san kapikukuh antuk pararem.
7. Sang katiban cuntaka, luwir :
 - Ha. Kalayusekaran, sane cuntaka:
 1. Sang kalayusekaran;
 2. Kaluwargannya;
 3. Bebanjarannya;
 - Na. ngrajaswala, sane cuntaka : sang ngrajaswala punika;

Ca. ngembasang putra, sane cuntaka : sang madarbe putra lanang wiadin istri, utawi yayah renan sang wahu embas;

Ra. Pawiwahan sane cuntaka, sang mawiwahan lanang wiadin istri, utawi dampati lanang istri;

Ka. Karuron, sane cuntaka: sang karuron rawuhin lanangnyane;

Da. Gamia gamana, sane cuntaka:

1. Sang nglaksanayang gamia gamana;
2. Desa pakramannyane
3. Sang ngelaksanayang gamia gamana salah timpal patut maprasita biukawon merajan suang-suang. keni upakara caru manca ring suang-suang pelinggih diwewidangan desa adat abing sane kerareban olih krama desa adat sami

Ta. Salah timpal, sane cuntaka:

1. Sang nglaksanayang salah timpal;
2. Desa pakramannyane;

Sa. Anak istri mobot malantaran lokika sanggraha kandugi pecak nenten katiwakin upakara/upacara pabiukawonan, sane cuntaka : anak istri sane mobot punika;

wa. Anak istri ngembasang putra malantaran lokika sanggraha kandugi pecak nenten katiwakin

upakara/upacara pabiukawonan miwah widhana, sane cuntaka;

La. Mamitra ngalang sane cuntaka : sang ngalaksanayang mamitra ngalang punika;

Ma. Sad atatayi, sane cuntaka : sang ngelaksanayang sad atatayi punika;

8. Sang tan kenang cuntaka, luwire;

Ha. Sang sulinggih;

Na. pamangku kahyangan tiga rikala piodalan tur sampun ngayah tigang rahina ring pura sane kaemponin utai sampun ngalang sasih utawi ngalang tengah.

1. Pamargine atiwa-tiwa pangabenan kalaksanayang mapagamel kecap sastra agama miwah drestan desa.
2. Peputusan pengabenan, kasuluran manut pararem.
3. Pangingune ring krama banjar, kasulurang manut pararem.

Pawos 34

1. Mapargin atiwa-tiwa utawi pengabenan kalaksanayang mapagambel kecap sastra agama miwah drestan desa.
2. Peputusan pengabenan, kasuluran manut pararem.
3. Pangingune ring krama banjar, kasuluran manut pararem:
Manut kelascarian sang sane maduwe kelayusekaran

Palet 4
Indik manusa yadnya
Pawos 35

1. Krama desa minakadi krama desa, patut sareng nyanggra miwah nitnin yan wenten sinalih tunggil krama ngelaksanayang upacara manusia yajnya sane mabuat.
2. Tatacara panyanggrane inucap ring ajeng kasulurang manut pararem: Sedurung jagi ngelaksanayang pekerabkambe mangda mesadek ring prajuru punapi pemargi jagi kelaksanayang.
3. Sang pacang ngelaksanayang upacara manusia yajnya sane mabuat, mangda masodok ring prajuru.
4. Manusa yajnya ingih punika, upacara-upacara dharmaning kahuripan manusa, ngawit saking patemonin kama bang lan maka pet5ak sejeroning gerbha, ngantos kalayusekaran ri wekas.
5. Upacara-upacara inucap ring ajeng kamrgiang kanista, madhyama, utama, manut kecap sastra agama miwah dresta.

Palet 5
Indik bhuta yadnya
Pawos 36

1. Desa adat abing patut nyaggra pamargin bhuta yajnya, marep ring kabuatan desa adat abing.
2. Pidabdab pamargin bhuta yajnya inucap ring ajeng, mapagamel kecap sastra agama, kaanutang ring dresta desa, sane kapikukuh antuk pararem.
3. Krama desa minakadi krama banjar patut sareng nyanggra yan wenten sinalih tunggil krama sane nglaksanayang upacara bhuta yajnya sane mabuat.
4. Sang pacang nglaksanayang upacara bhuta yajnya sane mauat mangda masodok ring prajuru.

Pawos 37

1. Bhuta yajnya marep ring kabuatan desa adat minakadi carun sasih miwah sane lianan, kasuluran manut pararem.
2. Indik pamargin palelastian utawi makiyis, kasulurang maut pararem.
3. Nangken warsa, rikalaning tilem sasih kasa, patut kalaksanayang tawur kasanga pangrawuh nawa saka (tahun baru saka), ring pinanggal apisan sasih kadasa, sane kawastanin nyepi.
4. Rikalaning nyepi, sowang-sowang krama desa patut ngamargiang catur brata penyepian, inggih punika:
Ha. Amati geni :tan kengin maapi-api;
Na. amati karya :tan kengin nyambut karya;
Ca. amati lelungan :tan kengin melelungayan merika-meriki;
Ra. Amati lelangwan :tan kengin maoneng-onengan , ngwiji lan suara ghora, nabuh gegambelan lan sekancannya

5. Catur brata penyepian punika kamargiang saking semeng jantos banjangne ngadas rahina.
6. Mangda pamargi catur payepian punika trepti, patut katilikin antuk tetelin desa sane kawastanin pacalang desa tur sang mamurug patut katiwakin pamidanda, sane kasulurang manut pararem:
Yen sunalih tunggil catur brata penyepian ten kelaksanayang olih ikrama patut keni pemidanda berupa jinah akeh nyane Rp 50.000.
7. Banjangne ring pananggal ping kalih sasih kadasa, kawastanin ngembak geni, sowing-sowang krama patut saling ngaksamayang sane kawastanin dharma santi

Pancamas sargah
Sukertan tata pawongan
Palet 1
Indik pawiwahan
Pawos 38

1. Kram desa minakadi krama banjar, patut sareng nyanggra miwah nitenin yan wenten sinalih tunggil krama sane nglaksanayang upacara pawiwahan.
2. Pamargin pawiwahan, luwire:
Ha. Malantaran pepadikan;
Na. melantaran ngrorob, merangkat ririh wahu kakrunayang;
Ca. melantaran nyentana nyeburin
3. Indik pawiwahan, desa adat abing ngemanggehang undang-undang miwah peraturan pemerintah, indik pawiwahan.
4. Tatacara panglaksanannya, mapagambel kecap sastra agama, kaanutang ring dreastan desa, sane kapikukuh seroning pararem.
5. Sinalih tunggil krama sane pacang nglaksanayang upacara pawiwahan, mangda masadok ring prajuru.
6. Sinalih tunggil warga yan wenten sane mobot ten wenten sane ngakuin bobot ipun patut keni pedanda Rp500.000. patut mekrabkame sareng keris kasuluran olih iprajuru sami.
7. Yan wenten krama ngembasan putra sadurung mekale-kalean / meprasita biyukawoan patut keni pamidanda Rp 500.000 ngelantur ngupah ayu gumi,minakadi mecaru sepura-pura.

palet 2
indik nyapihan
pawos 39

1. Prajuru desa minakadi prajuru banjar adat, wenang sareng mawosin miwah nitenin yen wenten sinalih tunggil krama sane mapikarsa pacang palas marabi, mangda nenten kadurusan dados nyapihan.
2. Yan krama inucap kukuh ring pikarsannya, desa minakadi banjar adat nenten sumakuta ring pamarginnya.
3. Sederenge pastika polih pamutus saking sang ngawawenang minakadi sang rumawos (pengadilan negeri), krama inucap manggeh keni tetegenan kramasekadi nguni.
4. Krama sane sampun sah palas merabian kebanjar yan krama inucap malih mewali merabian sareng rabinnyane sane dumunan patut keni penanjung batu 35kg beras.

Palet 3
Indik sentana
Pawos 40

1. Prajuru minakadi banjar adat wenang sareng mawowosin miwah nitenin yan wenten sinalih tunggil krama sane ngindikang sentana.
2. Indik sentana, desa adat abing ngemanggehang uger-uger jagat ,inakadi kawicaksanan sang maraga guru wisesa, kaanutang ring drestan desa, sane kapikukuh antuk pararem.
3. Sang pacang ngrajegang sentana, mangda masadok ring prajuru.

Palet 4
Indik warisan
Pawos 41

1. Prajuru desa minakadi prajuru banjar adat, wnanng sareng mawosin miwah nitenin yan wenten sinalih tunggil krama sane ngindikang warisan.
2. Indik warisan, desa adat abing ngamanggehang uger-uger jagat minakadi kawicaksanan sang maraga guru wisesa, kaanutang ring drestan desa , sane kapikukuh antuk pararem .
3. Sang pacang ngindikan warisan, mangda masadok ring prajuru.

SASTHAS SARGAH
SUKERTAN TATA PALEMAHAN

Palet 1
Karang,tegal,lan carik.
Pawos42

1. Krama desa sane ngamong karang pumahan ngraga patut ngwastanin karangnya sowing-sowang antuk pagehan/turus utawi tembok,mangda pakentenannya asri.
Ha. Sinalih tunggil krama sane ngelalah wates patut oleh prajuru keni pidanda
Rp 1.000.000
2. Watese sane mawasta gegaleng kaluan ,iwah gegalang katebn mangda nganutin drestan, tur kakaryanin olih sang negen weres inucap. Patut keni pidanda Rp 500.000
3. Prada karasayang peh\gehan/turus inucapnglikadi, yan pada arsa panyandinge, watese kengin nganggen pinget utawi pracihna pal saking agrarian, sakewnten kasaksi antuk prajuru desa/banjar adat.
4. Prade wenten karang kabebeng, mangda kautsahaang wenten pamwsuan sane pastika.

Pawos 43

1. Sinalih tunggil krama desa/banjar adat, nenten kalugran:
Ha. Ngalah-ngalah margi, karang desa,tegal ayahan desa, tegal / carik krama liyan , lan sakancan punika;
Na. ngalah-ngalah tegak kahyangan, setra lan sekancan tegak sane sinangeh suci.
2. Prada wenten mamurug kecape ring ajeng, sang mamurug, patut ngwaliang tanah inucap, tur sang ngalah-alah tegak suci inucap, taler patut karuntutin antuk dewa danda miwah artha danda, sane kasuluran manut pararem.

Palet 2
Pepayonan
Pawos 44

1. Ngawit nadur pepayonan minakadi tanem tuwuh, patut adepe agung ngereroang saking wats: pepayonan minakadi tanem tuwuh sane jantos ngliwat wates, wenang kesepatgantungin
2. Pepayonan sane ngungkulin mawastu mayanin ka pisaga , sang nruwenan pepayonan inucap patut kewara tur kairing mapiguman antuk sang rumasa ketetehan, bilih-bilih sang nruwenang arsa ngrebah utawi norok wit pepayonane punika.
3. Pradane sampun kawara taler tan wenten utsahan sang nruwenang sang rumasa katetehan wanang masadok ring prajuru, tur risampune kaparitas kandugi wenten lelugrahan prajuru, wawu wit pepayonane punika kangin karebah, sakewenten panukun patun wit pepayonane punika patut katahur olih sang rumasa ketetehan manut panglokikan sang nepasin, tur wit pepayonane sane karebah punika kasukserah ring sang nruwenang.
4. Sang patut keni pamidanda panyangaskara saha prabea manut pararem, ,arep ring wewangunan sang karubuhan, luwire:
Ha. Sang nruwenan wit pepayonan sane sinanggeh mayanin, prade pungkat padidi tur ngrubuhin wewangunan krama tiosan;
Na. sang notor, monggol utawi ngrebah taru, tur ngrubuhin wewangunan krama tiosan
5. Krama desa patut ngemanggehang kewredian tanem tuwuh sane ngawinang desane asri tur lestari sane kawastanin bhutahita, sane meteges kalestarian lingkungan hidup
6. Sinalih tunggil krama sane pacang ngrebah pepayonan minakadi tanem tuwuh sane ngawinang desane asri tur lestari,patut masodok tur nunas lelugrahan ring prajuru desa adat.

Palet 3
Wewalungan
Pawos 45

1. Nengken ngwangun, sowang-sowang krama patut:
Ha. Masodok ring prajuru,mapekas marep ring wewangunan sane mapanyaitan minakadi menengin wates;
Na. ngangge asta bhumi miwah gegulak asta kosali, sanistannya manut ring patutise ka Niskala.
2. Prade wewangunan jantos nyabuhin ka pisaga, bilih-bilih temboke ring telenging wates, risampune kawara tur kairing mapiguman taler tan wenten usaha sang nruwenang, kangkat kasadokan ring prajuru; sesampune kaparitas tur wenten kelugrahan prajuru, sang nuwenang wewangunan wenang keni danda manut pararem, tur tembok inucap patut kagubah olih sang nruwenang, sanistaya kakaryanan abangan.

Palet 4
Wewalungan
Pawos 46

1. Sahanan warga desa sane miara wewalungan : bawi, banteng lan sekancan punika mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilih-bilih jantos ngranjing ngletehin kahyangan.
2. Prade wenten peabianan krama sewosan, risampune kawara taler nenten wenten utsahan sang nruwenang, yan wewalungan punika malih kengin katabahan, tur sang nruwenang wenang katibakin danda ngwaliang panukun,wit tetanduranne sane karusak, saha nahur panebas papiaran tetabahan, manut panglokikan prajuru desa/banjar adat
3. Prade wenten wewalungan ngranjing jantos ngletenin genah suci, minakadi kahyangan, pamrajan lan sakancan punika, risampune kaparitats antus prajuru, sang sang nruwenang wewalungan inucap wenang keni dewa danda lan artha danda, agung alitipun manut kecap sastra agama, sane kapikukuh antuk krama desa/krama banjar adat.
4. Krama desa patut nyerahin wewalungan miwah sarwa prani, tan kapatutang mademang paksi, nuba alum lan sakancan punika, punika, pinaka sunalih tunggil usaha krama desa ngardi bhutahita.
5. Sang mamurug kecape ring ajeng, wenang keni danda manut pararem.

Palet 5
Bhaya
Pawos 47

1. Bacakan bhaya luwire : jiwabhaya, arthabhaya,agnibhaya,toyabhaya, lindubhaya, lan sakancan punika sane ketahipun kawastanin pancabhaya.
2. Sinalih tunggil krama sane manggihing prachina pastika wentene sahanan pancabhaya, patut digelis nepak kulkul tengeran kapancabhaya, tur digelis masadok ring prajuru.
3. Prade desane kahanan jiwabhaya, krama desane patut ngaturan upacara pamahayun desa manut kecap sastra agama sane kapikukuh antuk krama, tur sang ngwetuang jiwabhaya, katur ring sang ngawawenang.

Pawos 48

1. Sinalih tunggil krama sane manggihing prachina pastika wentene arthabhaya(kamalingan), patut digelis nepak kulkul tengeran pamilutung manut pawos 15 (3) utawi pawos 16(1); sang kamalingan patut digelisa atur supaksa ring prajuru ; sang kacihnan ngamaling, katur ring sang ngawenang, maweweh malih patut keni dewa danda lan artha danda manut pararem, yan ipun ngamaling barang druwen desa sane sinanggeh suci.
 - a. Keni dewa danda berupa upakare caru eka sata prasita biyukawon jangkep
 - b. Keni arta dande akeh nyane Rp500.000 tur ngewaliang druwen desa sane ke paling
2. Sowong-sowang krama desa tan kapatutang mapailonan ring dusta; sang kacihnan mapailonan ring dusta patut katibakin danda kadi dandaning maling, sane kasulurang manut pararem.yening wenten prejuru/krama yening mapailon ring sang dusta patut keni arta dande jinah akeh nyane Rp500.000.

3. Indik ngrereh reramon minakadi daun kelapa,ron miwah sane sewosan ring pabianan tiosan ri kenjekan suwung, kasulurang manut pararem.keni dande berupa arta dande Rp500.000
4. Indik ngranjangan pakubon utawi pakarangan krama sewosan rikala suwung, mawastu raris sang madarbe pakubon utawi pakarangan punika kaicalan, kasuluran manut pararem.kni arta dande Rp500.000 tur wenten bukti lan saksi.
5. Indik ngranjangan pakubon utawi pakarangan krama sewosan rikala suwung riantukan wenten pisarat sane mabuat minakadi mapangarah miwah kabuatan sane liyanan, kesuluran manut pararem.patut kedagingin piteket utawi sawen.

SAPTAMAS SARGAH
WICARA LAN PAMIDANDA

Palet 1

Indik wicara

Pawos 49

1. Sane wenang mawosin wicara ring desa adat abing, inggih punika prajuru desa adat abing.
2. Prade sang mawicara tan cumpu ring pamutus prajuru desa adat, kengin nunas ring sang rumawos utawi pengadilan negeri.
3. Sahanan wicara sane mawit saking kacorahan sakaluwire sane singgeh nungkasin daging awig-awig, pasuara miwah pararm desa/banjar adat,patut digelis kabawosin olih prajuru, nenten nyantos pasadok malih.
4. Sajaba wicara sakadi ring ajeng, patut nyantosin pasadok sang nunas bawos.
5. Panepase mangda pastika nyantenan iwang patut malarapan triparama,inggih punika : saksi,likita,bukti,tur panepas tan marep nepek ring catur dresta.

Palet 2

Indik pamidanda.

Pawos 50

1. Desa/banjar,wenang nibakang pamidnde ring warga desa /banjar sane sisip.
2. Tetibak pamidande inucap ring ajeng, kalaksanayang olih prajuru.
3. Bacakan pamidande,luwire:
 - Ha. Ayahan panukun kasisipan;
 - Na. artha dande saha panikelnya,miwah panikel paturunan;
 - Ca. karampeg;
 - Ra. Kanorayang;
 - Ka. Kawusanang makrame desa;
 - Da.panyangasakara.
4. Pamidanda sane katiwakang patut mesor singgih, manut kasisipan.
5. Jinah utawi artabrana pamidana, ngranjing dados druwen desa/banjar adat.

Pawos 51

1. Krama sane langkungan ring tigang paruman nglantur nenten nahur paturunan miwah dedandan, wenang karampeg.
2. Tetibak pangrampagen, nganutin tatacara sakadi ring sor punika:
 - Ha. Kalaksanayang olih prajuru, kasaregin antuk krama pinih akeh tigang diri, maka saksi;

Na. sang ngrampeg patut madarsana rikala ngambil barang minakadi nyawenin tanem tuwuh, sane ageng pangargannyane manut ring utang sang karampeg;

Ca. prajuru patut miteketang mangda barang-barang sane karampeg punika digelis katebus masenger awuku, tur ring kutus rahinane pacang kalelang utawi kaadol ring ajeng krama desa adat.

Ra. Ten kengin ngrampeg saluwiring barang sane patut inggilang manut sastra agama, miwah mademangpangupajiwane sang karampeg.

Pawos52

1. Prade sang pacang karampeg mialangain pamargin pangrampagan inucap, mawatsu sampun tan nganutin ring awig-awig, krama inucap wenang kanorayang.
2. Yen krama inucap manggeh piwal yadiastun sejeroning makudang-kudang paruman sampun kawehin patinget sakewenten manggeh piwal, tan wenten pamargi sewos, sajawaning krama inucap kawusanang makrama dese.
3. Pangrampagan inucap ring ajeng kabawos buntas, risampun sang keni pangrampagan punika:
Ha. Nunas geng rana sinampura ring ajeng krama desa/banjar adat, riantukan piwal ring pasubaya sane pecak sampun kararemin;
Na. nahur pangargan panguwak pasubaya sadaweg pacang karampeg, kadulurin antuk prayascitta.

ASTAMAS SARGAH NGUWAH-NGUWAH AWIG-AWIG

Pawos 53

1. Nguwah-uwahin awig-awig desa dat puniki, wantah kengin kalaksananya antuk krama desa.
2. Pakarsane nguwah-nguwah punika, mangda mawit saking pakarsan krama desa, yadiastun kamedalang antuk sinalih tunggil prajuru, utawi sinarengan.

Pawos 54

1. Sikaluwiring indik sane sampun wenten sadereng awig-awig punika kasurat, mangda kaanutang ring sadanging awig-awig puniki.
2. Sakaluwir sane durung kasurat sajeroning awig-awig punika, menawi kangkat kanggen mitegepin awig-awig punika, pacang kasurat jeroning pararem.

NAWAMAS SARGAH SAMAPTA

Pawos 55

1. Awig-awig puniki kawastanin awig-awig desa adat abing .
2. Awig-awig punika kamargiang ngawit saking kaingkupin utawi kararemin.

Pawos 56

1. Awig-awig piniki karermin duk rahina buda, wage, wuku menial, penanggal apisan sasih karo, saka warsa 1928, tanggal 26 juli 2006, Mageanh ring bale banjar abing.
2. Awig-awig puniki kalihnggatanganin antuk bendesa adat miwah olih sang ngawawenang manut kawanggannya sowang-sowang, tur kapikukuh antuk murdhaning pamikukuh : bupati tabanan.

3. Luwire sang nglingatnnganin: